

摘藻堂四庫全書薈要

集部

欽定四庫全書薈要

集部

盤洲文集卷五十八

六至

詳校官助教臣謝登雋



欽定四庫全書薈要卷一萬五千八百六

集部

盤洲文集卷五十六

宋 洪适 撰

啓二十二首

賀施察院啓



龍膺制綽進陟憲臺最天下之兩轡卓然獨步迎日邊
之一節久矣不聞夙儒既升僉論相快恭惟某官體局
方整襟靈壯堅壁韞珠藏早埋光於川嶽鴻軒鳳舉即
薦瑞於朝廷方正笏於豸冠忽分麾於魚契受釐宣室

已深賈傳之思斂惠富州果下陸君之詔青氈復得白
簡並嚴少煩明目張膽於鵷鷺之間行見聚精會神於
槐楓之上某自睽巖電屢換星霜旅進退以無繇虛寒
溫而敢問

賀陳帥生日啓

候明星於南極聿臨見丙之期賦峻嶽之聲詩允協生
申之什祥開初度頌溢維祺恭惟某官天上謫仙人中
間氣河目乃公侯之相泥塗無甲子之疑江左建旗良

吏於是為盛嶠南揭節膚使其猶劣諸遂居方伯之尊
式賴長城之扞宣室思前於賈傳吳人難挽於鄧侯在
厥初生必得其壽彼松柏四時之貫所謂經寒而知惟
龜鶴千歲之殊斯可同日而語某情深賀履禮昌登門
有酒如澠敢介遐年之祉若金作礪即看晉晝之榮

賀呂總領啓

榮拜制綸寵將使指聯華省戶依烏瞻列宿之文足食
屯營流馬幹百城之運郵音所暨輿誦謂宜恭惟某官

超卓賦材沈深置度殖學得傳家之妙飛談馳驚座之
名既剖竹於雄藩遂埋輪於劇部以經潤飾通儒稱者
三人有志澄清天下號曰八俊並隆瓌望密簡眷知凡
財用之在版圖式付民曹之寄給饋餉不絕糧道重分
軍政之權即迂節趨豈容席煖某仰高有素快覩未降
借蔭鄉雲方備員於嶺表貢誠子墨敢贊喜於門闌

賀黃提刑交割啓

兼程叱馭涓吉佩章善類得所依歸遠人無不忻頌某

官咀華竹素擢幹梗柟魁然見長者之風溫其有君子
之德蚤聳烏臺之望游煩龍節之行五嶺澄清初祥刑
於東表九重簡注迺易地於西偏斯拜渥恩復臨舊部
夸鄉上豕散金能洽於故人輿轎入疆持斧載瞻於膚
使即聞嚴名歸遙近班某自讀制綸即飛慶牘庀官席
蔭喜既僂于眉端指日接辭情庶披於心曲

賀廣帥陳侍郎啓

伏審名簡帝心任宥方面輕裘合北久傳峴首之碑興

轎宅南來酌貪泉之井先聲所偃公望迨歸恭惟某官
參軌前良垂模後進廣庭高步仰三傑之颺芬要路橫
翔凌九臯而徹聽誨方袍於槐市讐斷簡於蓬丘列星
已應於天文四牡暫煩於風力惟臯呂體觚圈之意故
閩制有固空之隆秉筆赤墀記注為千古之法絕綿外
野禮儀成十月之朝繇甘泉近侍之班作襄漢上流之
鎮自休閒館未塞輿言方謀帥臨黃木之灣乃任公開
紅蓮之府羊仙薦祉必須執轂而來龍戶集庭當有憇

崇之聽上召則邇人留實難某夙際光儀猥勤題拂鳴
珂相踵深慚糠粃之揚膠柱不調所幸瑾瑜之匿偶濫
移於左契度難俟於高牙憑柔尺以搖情勻和襟之納
祐

賀廣漕鄭郎中啓

伏審光奉帝俞肅將使指車茵所問來休黃木之灣印
筭重開自是青氊之物積十年之遺愛踴列郡之先聲
恭惟某官德湛量陂名馳藝圃雅雅黃鍾之在簾英英

白璧之輝山八俊拔竒特表絃歌之績九重錫對遂榮
銅竹之行入贊大農進符列宿賦皇華而隃額振漕事
以裕民自奉計而歷宅官忽拜恩而臨舊部雖木牛流
馬之陳迹較然可尋豈雲龍神虎之通閨闕而不召人
勿私喜公寧久留某夙景高躔未親餘論自聆詔綽謂
依賴之可期偶易州麾復差池而相失尚借光於仁里
仍接畛於治臺竊圖行李之間或有班荆之便

移福州謝趙提刑啓

輯粵空餐既大何之幸免掌閫出命顧繇力之弗勝惕
拜絲言喜授樾蔭伏念某賦尋常之質闕尺寸之長隄
五嶺者八年易九垓之三組心雖龜勉初無畫餅之虛
名志欲激昂終愧貪泉之高躅恐黜幽而負殿方請代
以圖歸豈料清朝游移要屏大懼鉛刀之鈍難求布鼓
之聲行闕中天望日華而已近故鄉接畛知風景之不
殊自非麈尾品題之私安得羊角搏扶之便此蓋某官
直方厲操淳白鳴徽有更生博極之書得東平為善之

樂望室派玉節峻輔金屢司發軔之權復佩平反之寄
用恩及下為長者而折枝見惡在前如農夫之去草時
謂外臺之表人歡夏屋之依每曲借於揄揚致疊叨於
推擇某自尊山斗浸換星霜聽言未愜於鄙悰投分已
同於夙契遂殫五技敢忘前事之師少借六條庶追後
期之責

謝鄧建州啓

輯粵空餐偶大何之獲免掌閫出命顧縣力之弗勝惕

拜詔綸幸分鄰燭伏惟某官宅心端栗接物惠和才備
四科挹前良而參軌風舒六藝發妙語於抽毫嘗鉤校
乎三尺之文迺翱翔乎半刺之任鑄龍班節原隰遠有
光華分虎作符朝廷深知治行籍籍袴襦之詠駸駸筆
橐之除惟平時曲借於衮褒致懦品疊更於器使某自
親風度已託歲寒樾蔭焉依嘗略六條之間棠陰密邇
復漸九里之餘

回知州賀生日狀

伏承軫記生初騁妍意表月宿南斗無片善以著稱體
號西崑有英辭之轍古高情甚渥朽質增慚伏惟某官
論議粹醇襟靈超詣材推時彥暫分阜蓋之權清畏人
知共說素絲之節夙締芝蘭之好欲光蒲柳之衰貽之
嘉音介以難老一字之踰華袞拭目難任雙金之報綠
琴覩顏何已

謝知州惠生日詩狀

誦蓼莪之篇老將至而增感介黃髮之壽禮甚厚以難

任深戢謙撓架增悚汗此蓋某官德惟貴齒仁以根心
決雀鼠之訟於棠陰案無留牘摘錦繡之章於毫穎才
有殘膏斯因初度之辰曲借長年之頌確然殊倦下鱗
使於長川賁以好辭追馬人之前蓀剖珠私喜報玖知
慚

回連大庾狀

講聞風問積有歲時獨覲面之差池每馳情而悃結某
官學充素蘊世述清埃遠彈弁於梅山久鳴弦於花縣

服勞五斗已書集鳳之能振響九臯即拜簞鴛之寵曲
承華訊徒激鄙悰顧藏篋之翩翩慚濡毫之草草

回州學正錄狀

竊審較評粉社立矩矱宮人皆曰然公豈自歎解元沈
潛蠹簡埋鏟螢牕未逢流水之知尚屈青雲之便朋友
共惟於講習深戒繡鞶老成端有於典刑遂儀逢掖某
曲迂玉趾見賁瓌詞第銘四益之謙有覲七襄之報

回何直閣狀

分麾百粵已越戍期徙部七閩誤膺詔札揆謗材而惕
若倚餘潤以欣然某官冰壑照人驪淵瑞世談必傾於
一座書能讀於五車下筆掀雷淡墨題乎鼎級吹藜奪
月雌黃匝乎蠹篇猗歟雋聲籍甚榮路已青冥之垂上
却朱紱以退飛既聯職於道家蓬萊迺俛眉為諸侯賓
客鬱沈亦久蘊蓄未攄惟曲借於齒牙致屢叨於方面
合盍簪於曩日數判袂以積年何幸哀蹤復尋舊好驅
車倍道庶瞻西阡之登掃榻聽言敢後正堂之避

回參議賀郎中狀

分麾百粵已越戍期徙部七閩誤膺詔札揆繁劇而縈
抱倚飲助以信眉某官學綜九丘詞傾三峽丹霄騁步
開天祿之陳編列宿垂芒賜喻麋之佳墨遂抽簪而飛
遯旋側席以旁招方退然油幕之游迺昔者繡衣之治
增重外閫寔煩遠謀顧是微蹤遂將竊食介季父同年
之好頃接英躔記池陽一夕之談屢更緹律復有親仁
之便可知逃責之方

代饒州守迎交代蘇尚書啓

伏審出綸法坐剖竹名邦千里心馳共仰甘泉之老一
襦顏汗冀新蜀郡之謠公望所歸先聲是偃恭惟某官
稟靈江漢發彩隨和讀八索之遺書備四時之和氣挺
挺有祖風烈濟美儒先堂堂為國光輝蜚英遶綴自粉
闈之影組入芸閣以提綱成春朝葩野之儀批夕拜瑣
門之敕國有六職峻紫橐之貳卿汝作秩宗續青瑣之
舊物夢刀屢矣買犢紛然難休老氏之祠來治番君之

國講德而論四子昔已作詩斂惠以施一州今當有詔
恐屈中道遂儀上京某夙企清蹕未親嘉誨鳴珂相踵
自慚糠粃之揚膠柱不調或幸瑾瑜之匿飛霜急節高
蓋出關冀祠鼎之嗇調副簪綬之瞻矚

賀知饒州李左司啓

易地出綸顯拜魚符之寵過家夸組甫嚴熊軾之程輿
誦道歸先聲是偃恭惟某官星躔躋祉月脇鑄辭卓爾
昂霄壁千仞而獨立淵乎韜世陂萬頃以有容自高鵷

鷺之行不藉蚍蜉之援臺官張膽久震懾於朝端宰士
盡心竭彌綸於省闈惟今剖竹所治蓋昔灌瓜之隣斯
民熟五袴之謠指日俟雙旌之至恐不席煖遂將節趨
某頃綴蓬瀛嘗披雲霧維桑有禮知夏屋之焉依置薤
可言冀賓階之與進

代程湖州謝執政啓

外史養痾方賦歸之三月輔藩代匱復流煥於九天班
祿云初哀遲自懼伏念某學不足以要終原本才不足

以治劇剽繁鳴玉要津點北門之清近懷金拱著憑西
府之贊襄久休香火之庭自適山林之性制綸橫及留
鑰遣行力以疾辭曲蒙恩貸尋邯鄲之故步偶未失之
求勾漏之祕篇他非望者豈期推轂仍使建旗惟茲荅
雪之區今作股肱之郡起家甚寵卧治則難茲蓋伏遇
某官德簡細旃望推隆棟方地闢天開之旦籍甚更張
念塗歌里詠之民遴其共理當都俞之間暇迺假借於
拙疎雖鞭策其不能恐譴呵之弗免終期美蔭不累化

鈞

代賀万俟相啓

渙號路朝升榮揆席家至戶曉幸聖政之一新日晏天
清見真賢之復用流傳所暨鼓舞率同恭惟某官道蘊
經綸學該貫變挺松柏後凋之操抱著龜先見之明徧
陟禁塗進叅國東間兩社而為輔備竭贊襄有一言以
興邦並崇倚注忽遭讒口遠落蠻溪孔子居中不勝麋
裘之誦周公在外競歌魚戩之詩大君躬攬於萬機溫

詔首馳於一節對揚便殿深契淵衷夢卜協求果作巨
川之楫棟梁有託大開衆正之門方懲沸而吹鑊必解
弦而調瑟宗祊道慶華裔具依某頃綴事樞密叨蔭樾
念階符之久曷際泰道之光亨代匱輔藩已竊貢公之
喜馳神材館莫瞻漢相之尊

代賀湯樞密啓

疏榮綸綍冠位樞機朝登真賢人有嘉頌恭惟某官鳳
翔千仞樂奏九韶健筆振奇飄飄有凌雲之氣清埃擢

穎赫赫乎逐日以新自首中於魏科即立登於榮路身
為國史嘗書笏以珥彤命作秩宗遂荷橐而持紫入明
光而起草對宣室之間神浸積簡知進居宥密淵謀入
告非堯舜之道不陳遠業所期豈管晏之功可許方朝
政判東西之府而宰臣充左右之官惟是元樞久虛高
位式應魁三之象聿求第一之流帷幄既尊何獨遐衝
之折樞紳相語益觀上治之興某舊矣仰高闕然快覩
承流輔郡已叨推輓之私貢牘崇階政竊併蒙之託

代張建康賀程參政啓

顯揚書贊叅秉化鈞惟舊德之立朝有頌聲之載路恭
惟某官學該治忽識判幾微元圭彰間出之珍喬栢聳
後凋之操凌雲霄而徹響踐台斗以結知文采陸離得
大誥三盤之體樞機周密如神爵五鳳之時不競急流
來休綠野方萬機之躬攬宜一節之首馳卑陪都管鑰
之司易輔郡股肱之寄上既久不見賈欲納嘉謨使無
何果召參遂司大政螺洲有識鵷閣可期某猥備藩宣

獲依塊北馳神西序旅進退以無繇投分東阡大譴呵
之或免

代謝魏越州啓

種東陵之瓜久甘退屏掌北門之管忽拜誤恩懇避莫
能疾顛是懼伏念某性則寡與學無它長綴侍橐於薦
紳毫毛何補奉真祠之香火齒髮浸衰政斂迹以養疴
豈牧人之興念遂叨晉錫采積震驚虎踞龍蟠茲作京
於岳狩雞鳴狗吠仍接壤於鄉關僥幸如斯吹噓有自

此蓋伏遇某官道包貫變識洞眇絲登要路以著鞭追
前英而叅軌方琴瑟更張之際有契符相合之知維石
具瞻政切公槐之望急流勇退忽傳使竹之分當一都
一俞之初借三熏三沐之助致茲推擇及此拙疎深慮
居併之危有辜推轂之意訟棠攸阻旅進退以無因蔭
樾焉依大譴呵之或免

代賀湯中丞啓

命播芝函位尊栢寺郵封四達歡誦一詞恭惟某官超

卓賦材剛方厲操自得青雲之路即膺丹宸之知方解
絃躬攬於萬機故出綍首馳於一節久不見賈非復鬼
神之談無以易堯即居御史之府鷹隼厲橫秋之勢豺
狼空當路之羣凡此茹連有同草薶積三十章之奏牘
振二十載之臺綱威動垂紳寵躋專席近世斯焉獨步
益峻風霜泰階所謂六符共期霖雨某庇身魚鱗引脰
龍門敢修染襮之儀少贊典籤之喜蕭辰始肅禁密多
休惟寶護於夙興用迎承於晝接

盤洲文集卷五十六

欽定四庫全書薈要卷一萬五千八百七

集部

盤洲文集卷五十七

宋 洪适 撰

啓十七首

上宰相啓

三千年而河清久矣人生之難竢七八月之苗槁幸哉
天澤之可期敢輸懇懇之私庶動巖巖之聽伏念某所
稟極陋其愚不移學雖苦於丘墳譽不揚於鄰曲操數
寸之管偕鴈序以齊飛受半通之銅點麟臺而羣處陟

岵幸迎於禿節入朝遽觸於危機不勝私情遂求外服
抗塵走俗已日往而去官洗垢索瘢致風聞之及嗣抵
於深憲儕彼壙僚玷缺隤聲雖生以何面目困窮纏已
脫死僅如毛毳再會赦而始復舊階一終星而未刊黜
典迫於立壁無以杜門登東臯而臨清流自憐骭下
喬木而入幽谷誰不邪揄未涓行李之良忽負茹荼之
痛偶逃溝壑得累鑪錘恭惟相公軌躅孔顏錙銖燕許
當聖主解弦而更化以真儒調鼎而贊元道大域中轉

洪鈞之一氣計安天下猶泰山而四維東閭廣翹材之
方西曹無滿謫之問某運將傾否筮亦遇干鷄失旦而
一鳴靡忘振翼鵲繞枝而三匝所願安巢倘回肉骨之
恩可但漆身之報

賀新饒州唐舍人啟

名簡前旒任隆左契聞使君到大喧來暮之謠與老人
期共快爭先之覩欲伸賀履敢問典籤恭惟某官聲叶
舜儀寶參郢握淵雲驚代挺玉壘之靈暉駟瑗名家禪

金籙之祕縕一時絃改多士節趨結當宁之深知拜司
光之異擢廣內雅雅世南則行祕書柱下昂昂董狐乃
古良史正刷橫翔之羽忽迴勇退之舟不謂吾邦廼煩
鉅德凝清香而森畫戟安能久居此乎闕紫闥而攀台
階斯拱而竦之耳某未披雲霧常歎參辰參千畝荻千
章遂托居山之庇水一盂薤一本願容置屏之談

荆門謝宰相啓

觀六符於穹漢心切呼天乘一障於重湖身難擇地仰

銜厚施敢寓微衷伏念某生以數竒缺然智寡頃疾顛
於僻郡即却掃於荒閭賤子具陳誰恤弓傷之阮室人
交謫畧無裝橐之儲謀半菽以偷生泣編麻而瀕死豐
澤未逢於時雨高躔已匝於歲星公道初開杖拭非辜
之士私憂遽集迨遭不孝之帑偶轉壑之賒期遇濟川
之在上抽毫進牘妄干亨否之榮援手覆羹危掇瀆尊
之罪傷哉貧也止或尼之敢期播物之私亦預承流之
數震雷霆而破蟄奮此幽蟠注渤澥以濯痕略其宿負

大恩特達小器滿盈茲蓋伏遇相公任重推溝材收躍
治欲八荒莫不擊壤無一介而使抱關吐握既躬其勞
爬羅有味其語前鴻後鴈或假借於雲霄枯木朽株必
薰蒸於芝菌特捐小壘漸進畸人某敢不履影懲懲刻
肌報德挾泰山以超北海揆路非難呼中道而激西江
恩波可冀

與交代趙知軍啓

與郡守為符忽焉分左躡君子之躅有以指南聊先汗

竹之私用結斷金之契恭惟某官琮璜等潤咸茂叅和
呈翔仞之靈輝抱昂霄之美幹多文為富足更生博極
之書大雅不羣得東平最樂之善懷佯廩仕烜赫華名
清標共仰於素絲錯節始彰於利器方英主攬權綱之
柄欲諸姬壯磐石之宗凡朱軒皂蓋之除多玉葉金枝
之雋一麾敷惠最楚甸之列城五袴作歌挹西京之循
吏聞今日耕桑之野皆向時荆棘之場有凝寢之清香
無穿墉之健訟已成樂土為利後人諸公興推轂之心

闔郡阻留鞭之計即前帝席遂陟從班某風景高標未
親餘論水擊三千里而上將幸瞻前刃遊十九年而新
願言告舊傾翹之切敷染亡窮

為大兒江東漕屬上使者啓

家徒四壁甫從宦海之遊我有二天遂席卿雲之蔭方
憂尸素敢後殺青伏念某馬走品微鼠肝姿薄學六甲
五方之事佩鞶無聞讀九丘八索之書為裘滯墜蚤因
延賞獲免請農正鼓笈以求師敢彈冠而入仕嚮生私

室禍及大門遺忠見軫於朝廷異數俾襄其宅窆猥令
就祿非曰量能退惟一物之不知安得三年而善後乘
財用之出入尺寸無長計班資之崇庠斗筭奚算仰祈
覆露尚切趑趄恭惟某官學貫籀滕識倫著蔡自占月
中之桂久騰日下之芬方聖君躬攬於萬機故鉅德首
迎於一節奉常絕禮進前席之嘉猷劇郡埋輪賴外臺
之華使擢象已躋於中秘疏屏深結於上知鏗錫八俊
之聲震懼六條之察即歸法從難借餘光某將侍履綯

獲承鞭策小兒未知為吏盡託恩波若曹無益於官難
逃譴域

荆門到任謝宰相啟

貧切膏肓歎編蓬之左計恩深缺北點剖竹之下陳逾
月汎舟蠲辰視印伏念某千慮無得一班弗窺少年妄
意於臨民或能豈弟半世銜冤而奪祿不復激印敢畫
指以書空祇甘心於殍野帝攬權而真宰用士失職者
泰道來補剗息黥育豐肌於朽骨捷鰭掉尾轉窮轍之

清波畧其三尺之拘畀以一麾之末惟當陽君之故國
在雲夢澤之西偏二百里男三百里侯本密連於近甸
六十曰耆五十曰艾皆熟記於舊聞雖創痍未復於承
平然風俗弗移於醇厚賦輿既簡獄訟不生儻鳴雞吠
狗無貪吏之須則去馬來牛有樂郊之漸退惟么膺恐
負使令茲蓋伏遇某官挈國大儒夢崑良弼叶璿璣玉
衡之効光金匱石室之傳以堯舜愧恥其心斯焉致主
彼臯夔密勿之輔可以齊名方校短以量長俾承流而

宣化興憐困躋初試凋殘豈止捐俸稍以活其妻孥亦將觀政事以品其人物某敢不自鞭蹇步庶効秋毫敢作偽聲以八萬流民而受賞尚期他日有五六老叟之送行不致瘵官是為報德

謝吏部賀尚書啟

十六年之去國久蟄蝸廬三千里而邇江始開蛇筭深憂尸素敢後殺青伏念某生也多難少而自苦操數寸之管偕同產以升榮受半通之銅群大雅而雙入陟岵

甫迎於禿節立朝遽觸於危機既補外以終更又投荒
之及難誰造哆箕之錦遂逢偃月之刀冤聲不徹於九
閭官簿退飛於一紀幸改絃之盛旦得夸組於小邦有
社有民惟當陽君之故也迺疆迺理自雲夢澤而左之
儻鳴鷄吠狗無貪吏之須則去馬來牛有樂郊之漸自
惟么膺恐負使令茲蓋伏遇某官韜軼英躔鏗鉤禁瑣
就日妙侍言之選廻天高批敕之聲懷文以裁帝墳書
成金匱分職而掌邦治班峻玉除緼推轂之仁心憐傷

弓之弱羽曲垂題拂致此叨逾某敢不思効秋毫自鞭
蹇步台符在望旅進退以未能雲蔭無私大譴呵之或
免

上荆南劉兩府啟

十六年之去國久隔鴈行三千里而溯江遠叨魚契焉
依夏屋敢後書郵伏念某生也多艱少而自苦頃中舍
沙之射遂傷偃月之刀冤聲不徹於九閭官簿退飛於
一紀幸改絃之盛旦得夸組於小邦窮猿投林見微柯

而亦喜枯魚涸轍得涓滴以更生茲蓋伏遇某官勲輦
邦基望崇人傑探金匱六弦之秘分狼弧參伐之威貫
日月以輸忠挫邊庭而奪氣袴襦安堵洽惠露於羣黎
樽俎折衝作長城於重鎮某自憐骭髀獲托帡幪異世
荊州復有依劉之幸列侯萬戶何比識韓之榮

謝王總領啟

船引蓬萊誰恤囚山之久符分銅竹自嗟乘障之微尸
素云何殺青敢後伏念某千慮無得一斑莫窺自射影

於舍沙祇甘心於殍野會清明之上治點宣布之下陳
有社有民蓋當陽君之故也廼疆廼理自雲夢澤而左
之雖創痍未復於承平然風俗弗移於醇厚退惟么厝
恐負使令茲蓋伏遇某官興學盈科清規出類芒寒列
宿言禮樂遠有光華檄到百城問錢穀幾何出入外足
連營之食上寬法坐之憂即以節趨難乎席煥顧小吏
漫加於鞭策恐外臺不款於幘幪某敢不詹仰光儀奉
行約束楚雖三戶尚求瘼之未能我有二天茲包荒之

可恃

謝宰相改正過名啟

十日寒之拙宦可題於良史一星終矣明刑獲改於秋
官佩造化之更生顧么微而何報伏念某昨從外補已
得代還偶親庭嬰禍於鑠金故郡將乘機而下石指為
奇貨肆厥巧言釀白簡以報私環赤城而滌垢法家舞
智卻回牘背之書獄吏趨時別上需頭之奏議辟遂淪
於胥靡免官自嘆於禿翁跼跼墮水之鳬奮飛無計累

累喪家之狗濱死誰憐已甘漂溺於風波何意清明之
天日望大鈞而辯數致密網之平反方商鞅作奔灰之
刑難乎免者如曾參有投杼之事久則昭然茲蓋伏遇
某官德類離倫仁心濟物佐域中之有大納天下於無
冤若伊尹之思匹夫恐失推溝之澤謂蘇君當宥十世
特施及嗣之恩出嚴棘之赭衣脫枯桐於黔穴某敢不
魂驚曲木跡鑒覆車復鴈門之跡益矜細行問翳桑之
病長記窮途

賀王成都啟

夢益三刀權尊九牧結裝去國不辭蜀道之難傳命塞
途已覺雪山之重貢誠小牘贊喜高牙恭惟某官象節
諧聲鄧林擢榦望傾後學仰北斗之垂芒名滿廣庭接
魁星而齊色會光亨于泰道能寤合于淵衷紬金匱石
室之書四提直筆鳴紅藥蒼苔之佩久演明綸追還渾
噩之風密吐忠嘉之論適坤維之謀帥輟鼎貴以籌邊
吾徒得君卧治之為淮陽而用黯有欲為王留行者願

孟子之在齊蓋摠戎于歲月之間即穆綽于廟堂之上
某退惟檣櫓浪託粉榆流澤九京既踰衮得見褒之字
冒恩一陣絲推轂而有味其言顧謝悃之未緘已除音
之先播卓然方伯財取道于隣疆縛以微官阻望塵于
謁舍甫新歲律正釀春寒冀垂意于持生副凝旒之慮
遠

答張縣尉狀

鼓琴有山水意未易知音擲地作金石聲自應擊節某

官沈酣七略鑽厲三餘異曲同工已有飄飄之氣博聞
強識必成灼灼之名徒煩問稼于老農盍請誨規于大
匠欣然嘗鼎媿彼報瓊

回教授啓

訪當陽君之故既玷左符定管城子之交廼聞高誼驤
眉則遠敷衽可期某官學海窮源文河涌思青氈對客
泰然一坐之寒絳帳稱師發彼三隅之誨以茲廣譽必
上清班顧以薄材遂攀逸駕庶幾良藥之誨可追素餐

之譏

謝張建康舉十五年前陞陟啓

治病七年那得三齡之艾成功一簣克全九仞之山媿
鄒子之夜光點汝南之月旦伏念某聲銷鄰曲識閭丘
墳頃佐郡以終更值含沙之肆毒獄皆文致既剗跡于
周行命與仇謀即灰心于榮進顧銓曹之不齒東伐閔
以相忘久矣棲巖期于萼野會更張于治具有復起之
痿人焚厥丹書假之皂蓋尋鉞刀而再割積璇厯以一

終計班資之崇庠未離墨綬為題目而甄拔烏有舊章
蒙秦階仰而思之幸異時勵有存者遂飛一鶚之表用
迴六鵷之程茲蓋伏遇某官天上景星人中霖雨帝以
召公而分陝世期汲黯之在朝十國為連借虎踞龍盤
之重八元斯九積蠅蚋蠖濩之思以留鑰而折衝蓋儒
冠之司命興憐社櫟獲託鄉枌推轂有味其言猥參寶
積納溝不被之澤倚竢洪鈞某名玷闕負時增倍價取
人失之子羽益務省躬草奏不如陳湯敢羞知已

謝魏潭州啓

居狄山之一障代匱隄冬陳方朔之六符依光垂象禮
存事大罪恐瀆尊伏念某馬走品卑雞尸用小引舡而
去渤海寢遠蓬仙登陸則有天台亦終瓜戍孰料舍沙
之毒巧符偃月之謀銜冤莫叩于九閭奪爵遂綿于一
紀循陔荒服幾不免于惡氛負土故山抱亡厓之沈痛
會蠲除于密網得撫字于疲氓考前名後杜于往圖未
能敷惠眇曲沮清漳之遺趾何以銷憂欲追謗郵實資

庇蔭恭惟某官材推隆棟名簡細旃初躬攬于萬機即
首馳于一節談曰猶望高子賴以興邦道蓋自比孟軻
去其塞路烜赫解紃之治超踰補袞之詩淄蠹靡留紀
綱丕變我心匪石必公道之大行衆口鑠金以价藩而
靜鎮薰重湖之叶氣鬱四海之甘霖某辭叨抽毫神馳
茸纛仰悛懔于夏屋竊動歡顏期垓北之大鈞倘收棄
物

與交代梁判院啓

聞買臣之引綬有客傳呼先越石而著鞭與公汎掃重
慙黷黷敢廢裁絨恭惟某官結綠輝山長離覽仞家傳
赤烏鄙簪笏于懷繡志凌青雲圖翰墨之勲績破古書
之萬卷諧雅奏于九磬繫聳壑之超羣即監州而騰譽
上念四蛇之輔嘗問世卿人稱雌霓之詞可司帝制曷
為頻首亦欲乘邊挾清漳而倚曲沮獨有仲宣之賦祕
明璣而潛美玉來續贊皇之詩某患不蘇枯罪難逃責
切喜契符之合廼逢筆硯之交必懷瑾以匿瑕不索瘞

而洗垢情同兄弟非彼一時之面朋好永子孫以吾兩人為鼻祖

回富提刑啟

天陞出綸坤維揭節方君行仁政務臻禁罔之寬欲下無冤民尤遴臺諫之選郵音所播僉誦曰然恭惟某官降祉雲逵騁詞月脇惟慶厯之變高有列傳言視西漢之韋平不同日道宜有家傳之學益增世濟之光自涉要津共騰廣譽天下號曰八俊比迹東都刺史問以六

條飛聲南服果聞簡注進掌平反諒無席暖之淹即有
圉空之効遂迎召渥歸立從班某夙仰高標未親餘論
曲城僻壤幸逢四牡之馳除館清泉遂借二星之重

盤洲文集卷五十七

欽定四庫全書薈要卷一萬五千八百八

集部

盤洲文集卷五十八

宋 洪适 撰

啓二十二首

迎施運使啓

傳建節乘輅之命竊喜幘幪講抽毫進牘之儀不虞蹉
跌恃兼容之雅量寬再瀆之嚴誅恭惟某官學蘊淵深
材猷超卓喬枚聳壑必應明堂之須英采輝山見稱東
序之祕自登文石益振芳埃著嶺表之澄清寄湖陰之

飛輓二星所次仰高漢而熒然六轡載馳環列城而惕
若仄聞騶哄密通璽封某鼠技雖窮虎符無補解印綬
而輕去未敢望風負弩矢以先驅由茲指日

答凌鼎州啓

伏審解組極邊擁麾名郡未還筆橐之舊列尚鬱縉紳
之公言恭惟某官量賦登閎識該貫變大對比魁星之
色高談開霖雨之期禁路光前思涌泉而錯枉長城扞
遠名立峴以蜚英方清朝渴竚于儀刑豈窮塞久勞于

籌畫少移印篆以便節趨漁洞桃花寧作成蹊之計沙
堤槐影想聞呵道之聲某蹈景歷年託隣旬月千里糧
不費行也有慙事鄭之儀萬戶侯豈足道哉竊幸識韓
之喜

回郢州侯教授啓

農疇聯屬殆雞狗之音相聞宦路差池乃馬牛之風不
及敢期四益先枉一行伏惟某官雅叶舜韶寶叅和璧
九變復貫執古道之權衡五色成文絢雕章之黼黻士

久尊于講席人常滿于坐氍毹洋然庠聲藉甚朝望過郢
中而歌雪難措客詞居稷下以談天共傳師說即汗青
于石室遂持紫于金門某質稟庸常心慙撫字斗升涉
遠正思鄉動遊子之情只尺仰高如逃谷有足音之喜

回胡知縣啓

讀太史之傳仰伯始天下之宗官君子之鄉講士龍雲
間之譽何期四益先枉一行恭惟某官覽仞呈祥額門
種學喬枚挺特材可備于明堂拱壁陸離寶盍陳于東

序重以鵠原之望共期鵬海之程卓爾高標恬于榮進
芙蓉汎水久挂頰于名山桃李成蹊將俛眉于壯縣少
試弦歌之績即叅紳佩之班某自顧凡姿漫無善狀為
孟玉而設榻廼幸肯臨曉漢陽而置孟願安承教

回王潛江啓

鳴雞吠狗幸四境之相聞足鯉多鴻枉一行而見寄深
佩謙謙之好有慙草草之酌某官輝穎時流叢芳世烈
允蹈淵源之學交稱盤錯之材千室鳴絃有長謠之詠

德餘糧棲畝繇善政以產祥爛其桃李之華屈此梗枏
之幹竚聆公舉入綴清班某猥玷郡章獲分隣燭明珠
絢彩知碣岸之不朽良藥發言庶沈疴之可去

與周郢州啓

鳴雞吠狗夙通里巷之歡食瓜條桑重結鄰疆之好可
無一紙往白雙旌恭惟某官包括多聞充盈雅量比美
玉精金之稱寶遇盤根錯節而知材繇綸寵以專城有
襦歌之塞路凝清香而談笑最治行于等夷賜洛濱之

詩正開元之重外奉會稽之計宜嚴子之留中某顧以
凡姿飄然遠宦河潤九里蔭方賴于餘波醫折三肱言
佇期于良藥其為詹遡未易布宣

徽州到任謝宰相啓

起徒中而護塞甫閱三時涉畿內以典城旁隣四壁仰
德輝而咫尺超恩紀于尋常伏念某造命多奇憂貧甚
久為十年之計者擔石無儲取一障而乘之大鈞未報
遠蒞凋殘之俗略無勞來之功正懼詣曾廼叨易地既

斥堠免望烽之卧敢過鄉效垂組之夸矧是富州咸謂
溪山之勝茲同輔郡密依日月之光在古今選用之不
輕獨朝夕憂虞其弗稱茲蓋伏遇某官道高夢野望峻
經邦右商實惟阿衡帝心平倚使趙重于大呂國勢尊
安以時棟而掄材蓋儒冠之司命取上駟不遺于下馬
由遠郊遂寘于近郊凡此生成若何糜殞某敢不力圖
撫字用答使令問羊然後及牛敢專任數搏螭不可破
蝨戒在容姦

賀湯左相啓

伏審庭渙明綰朝登隆棟轉洪鈞之一氣久矣贊元陳
秦階之六符誰其出右巖廊有慶華裔具瞻恭惟某官
智過萬人德尊一代金口木舌集聖賢之大成淵角山
庭應乾坤之上瑞充積覺民之道踐行稽古之言以著
龜先見之明致琴瑟更張之治成湯之于伊尹所謂千
載相逢孔子傳之孟軻共仰大儒之效屬有甲兵之問
不無疆場之疑邇瑣周知第沈烽于幽障廟謨素定迄

奠枕于上京副袞衣虛左之求賴鼎鉉光前之傑注意
采重顯面益尊某身在方州心馳潭府望塵擁笏莫瞻
望于喬槐贊喜抽毫聊整齊于尺楮

謝王樞密啓

起家荒戍旁隣左衽之邦易地輔州復接東阡之畛溢
寸襟而懷德具片札以貢誠伏念某技則五窮慮無一
得自禍萌于偃月已望絕于干霄落南山之萁久營半
菽決西江之水孰顧常鱗忽叨乘障之除未著利昨之

最饑者易食謂拙政之可稱實不副名偶外臺之並奏
何期誤渥驟畀邇封夸三組以過鄉敢循覆轍歌一孺
之安堵請事舊聞茲葢伏遇某官任重經邦道高弼后
楓宸納說非堯舜而不陳松漠結成雖蘇張而猶劣夙
垂推輓致玷選掄某敢不願補毫分恪遵甲令台星兩
兩仰光焰以非遙夏屋渠渠喜忻懽之有託

回闕通判啟

伏審拜恩中禁贊治名城枉月楮以見詒知星屏之且

至恭惟某官材猷挺特學蘊淵深英采輝山見稱東序
之祕喬枚聳壑宜應明堂之須臾久作于一行任尚居
于半刺同流王化政須康海之功高蹈天衢難屈凌雲
之氣某久聆雅譽未際英標將結好于金蘭庶免愆于
銅竹

回孔主簿啓

登仲宣之樓正遠懷于吾土曳任君之杖乃易守于隣
邦非藉揄揚那能僥倖伏惟某官稟暉閔里馳譽儒林

杞梓千章可謂昂霄之幹鳳鸞六翮共稱覽仞之祥即
上要津遂攄素蘊某頃雖一面忽已數年沃若惠音顧
瓊瑤之何報使之免戾幸藥石之不忘

與江州汪直閣啓

易地分符遙指高陽之里問津弭楫將披樂廣之天敢
修好于柔緘以聞名于畫戟恭惟某官覽輝千仞擅價
連城蘊弼中彪外之姿挺博古達今之識縹囊盈卷摘
黼黻之韙辭白水飛榮列龍蛇之英輔自登文石之陞

遂直道家之山長情論議有餘詳試左馮之政次公治
行第一首馳西漢之聲某鄉社相隣賓壻未步言如良
藥願見枕中鴻寶之書祿必素餐免坐柱後惠文之法

與饒州唐舍人啓

公堂懸榻記陳雷膠漆之情便郡把麾託虞虢輔車之
勢退循誤渥端出游談恭惟某官英氣吐芒清襟邁往
千仞覩儀庭之瑞九磬揚間代之音紬金匱之圖書粲
然麟趾夾紫宸之香案卓爾螭坳由寵綸以專城有襦

歌之載路嚴助勞侍從之事對以春秋文翁修學校之
官比于齊魯某自睽德宇已閱歲華受一廛而為氓夙
依廣廈潤九里而蒙福復竊餘波

賀張尚書啓

伏審命傳紫誥名得青氈復用張子房增西漢之氣象
有若南宮括作周室之典刑置郵流行海宇呼舞恭惟
某官量包廣博識判眇繇經綸自得于胸中糟粕不膠
于紙上掌建國之六典多士彈冠有興邦之一言宵人

欽社粵從去魯誰不劇秦既推偃月之堂即驗反風之
卜三接之際百神載驩我識履聲慶細旃之圖舊民瞻
岩石期寶鼎之調元必有超卓不群之謀以振光榮莫
大之治公固自任非堯舜之道不陳人亦有云豈管晏
之功可許共竚施設一新見聞某賀履情深掃門跡阻
字踰華袞已叨薦禰之私物播大鈞願偕鑄顏之列

賀何大諫啓

伏審制綸誕布從橐顯持名者實之賓久積稜稜之望

官以諫為職愈伸蹇蹇之忠邸狀所傳僉諧相慶恭惟
某官玉輝千仞樂奏九磬堯醲舜薰絕翰墨之畦逕周
情孔思酌道德之淵源自結眷知浸居言責幸聖主和
顏而納誨故爭臣造膝以陳詞卓爾不群如鷹鷂之逐
鳥爵去其太甚當豺狼不問狐狸欲崇丹匭之權廼峻
青蒲之拜儒先益進善類焉依視越人之瘠肥孰疑陽
子見鄭公之嫵媚必相唐宗某跡遠雞翹喜同燕賀號
五雲體疊榮謙牘之藏封萬戶侯未快賓階之覩

賀朱中丞啓

伏審命播楓宸位尊柏寺幾年美印上曰無以易堯一角
我冠仕者皆嚴憚黜幅員相語綱紀畢張恭惟某官
天壤蜚英山川稽瑞適堯舜帝王之道入淵騫德行之
科茹古涵今後學者有所統弼中彪外諸大夫皆曰賢
若時題品之公自奮功名之會振爭臣七人之職踐御
史三院之班志在擊邪如鷹鷂之逐鳥雀事先去甚當
豺狼不問狐狸奉簡以聞垂紳皆震積此立朝之望隱

然執法之除虛位揖第一人具瞻獨坐籠街過三百步
孰敢並行少倚風霜寔階霖雨某獲觀除目偶抗塵容
因筆墨以貢詞情均燕厦想簪裾之贊喜望隔龍門

賀楊尚書啓

伏審命出法宮位高常伯夏官其屬六十久虛司馬之
稱武王有臣三千斯掌戎車之政郵籤四達輿誦一同
恭惟某官識邃經郭量函德宇雅音從律中金石于宮
商闊步離倫去翰墨之畦逕蚤颺聲于全蜀已減價于

他揚久矣韜光筮之遇泰青瑣初批于詔敕黃麻久演
于訓詞兼麗卿雲由漢未之有也上規姚姒下周者其
誰乎遂躋八座之尊仍領七兵之舊峻班聯于玉筍增
光焰于金蓮帝曰識公上星辰而聽履人期柄國作舟
楫以濟川某獲覩絲綸莫陪簪笏寵踰華袞嘗叨荐禰
之私氣轉洪鈞或有鑄顏之幸

賀王樞密啓

伏審法宮渙號右府居尊魁一星曰天樞有光乾象面

三槐者公位益峻巖瞻人傑延登頌聲騰踊恭惟某官

量吞陂頃識洞著叢健筆振奇飄飄有凌雲之氣清埃

擢穎赫赫乎逐日以新頌正色以入臺不俛眉而媚竈

上既知其直道人爭仰于令名暨琴瑟之更張見棟梁

之巨用尊朝之始舉國相驩置郵流行追大誥三盤之

作樞機周密如神爵五鳳之時偶生疆場之疑頗有甲

兵之問心在王室請使者之長纓口伐可汗戢武人之

蕭斧至自朔漠安若泰山王言大哉立冠籌帷之上相

尊等耳名參台鼎之間凡此震瀛期于霖雨某情深躍
治迹阻班庭萬里折衝共慶精神之壯四子講德願贊
股肱之良

賀沈舍人啓

伏審命播朝昕恩隆接畫鳳閣目舍人之樣快覩黃麻
史官重宰相之權兼提直筆時有得賢之慶士歆稽古
之榮恭惟某官樂奏九韶玉輝千仞躋辭行遠屈宋當
得作衙官廣譽離倫曹陸羞稱于童子獨當文陣連中

儒科代言已妙于六題舉世皆期于三字久徊翔而難
進會搃攬而彙征海中有蓬瀛作英躔之領袖李下無
蹊逕振公道于銓衡方四禁之簡材為九重而起草煥
星斗文章之麗鼓雷風號令之傳夫惟思若涌泉然後
言如出綉虞夏之書渾渾爾可以齊驅伊望之業凜凜
乎行將爰立某自睽符采屢變律筭三人同行有我師
嘗扳逸軌千里其外曰甸服幸借末光願崖略于賢書
免沈迷于吏牘茲因賛喜庸敢投誠

回甄教授啓

伏審主盟儒道領職校官枉汗竹以見貽知成瓜之已
及伏惟某官器非近用學摠異聞蚤寒月窟之芳大振
雷門之響未通閨籍來續序音六七子之詠暮春正虛
品藻二千石不如逢掖迺得楷模已擊節于鴻文更傾
心于道範願言強飭以速問津

回張信陽啓

登仲宣之樓正遠懷于吾土光陸君之佩乃更治于富


州未講一行之書徒銘四益之德伏惟某官飛談卷霧
逸氣橫秋學本本以洽聞才多多而益辨為繭絲于保
障已播歡聲離雕鷲之風塵倚看長翮某來遊珂里尚
隔瑤林願聞拔薤之規庶追伐檀之刺

回嚴州樊察院啓

寄耳目之臺久留封外治股肱之郡密邇日邊風采一
新耄倪相慶恭惟某官道推先覺節挺後凋探聖域之
奧篇聲諧韶濩首英躔于淡墨名震京師惟卷舒不隨

乎時故否泰各反其類解絃之始冠豸甚休去義府雙
闕之前未伸直氣居元禮八俊之上遠振芳埃與人俟
調鼎之期釣瀨非黔突之地某粵從志學固已仰高庭
尚鬲于貢棊壤幸連于魯柝兩歧秀麥浸聞隣富之謠
七月食瓜有賴餘波之潤

盤洲文集卷五十八



總校官進士臣胡榮

校對官庶吉士臣李廷敬

騰錄監生臣趙寅

騰錄監生臣陸勳

欽定四庫全書薈要

集部

盤洲文集卷五十九至
六十一

詳校官助教臣謝登雋



欽定四庫全書薈要卷一萬五千八百九


集部

盤洲文集卷五十九

宋 洪适 撰

啟十九首

與太平州周侍郎啟

 地半仰韓舊矣執鞭之慕餘波及晉闕焉貢牘之儀輒

干禁瑣之尊少贖後時之罪恭惟某官材優王佐學冠
儒流蚤登清切之班雅負經綸之志席前奉簡與秋霜
而爭嚴柱下濡毫歲名山而不朽直躬獨步繇宇具瞻

不勝衆楚之咻自適一丘之樂迨更張于琴瑟方復拜
于旂旒廼陟天官仍司東學真賢去位不稅冕于當時
多士叩閣有舉幡之故事遠襲陽公之迹具存柳子之
書惟道大而不容必天定而能勝屢專名郡以利斯民
凝燕寢之香少煩重外作巨川之楫行且處中某流落
之餘沈迷于此小侯事大國正勤鄉往之私清渭分濁
涇庶託品題之末

賀饒州周侍郎啓

伏審秋浦政成受白髮厖眉之餞螺洲頌作喜朱轡皂
蓋之來初令一新英聲四達恭惟某官文穿月脇名埒
斗魁闕豹管之一斑衆知退步讀韋編而三絕久積多
聞既挺拔于俊躔遂表儀于侍橐典選振山公之啟披
文彰刁姓之非自出帝城屢專民社茲鳴珂之密邇同
衣繡而少留君薄淮陽耶方凝旒之重外誰踰仲卿者
必補袞以處中某頃萬珠庭幾周玉燭蒹葭所倚嘗分
芸閣之光桑梓未恭又賴瓜疇之潤

賀吏部沈侍郎啟

伏審顯盼帝制真貳天官黃麻似六經寶璐已高于紙
價青璫曰舊物精金遂煥于帶圍邨狀播傳儒流歆艷
恭惟某官人中間氣天上謫仙以昂霄縱壑之材有斂
矧焮鋒之器淵源道德異乎綆短以汲深星斗文章所
謂芒寒而色正茲重闕于紫闥因小憇于西垣兼麗卿
雲由漢未之有也上規姚姒下周者其誰乎凜封詔之
直聲見改絃之公道欲萃三銓之弊復思一代之英藻

鑑既精甄陶可必某情深賀履跡阻登門塊北之播大
鈞既聞興誦吹噓而起窮羽有待片言

賀汪侍御啓

伏審正色左臺御史聳殿中之職拜榮南榻惠文光柱
後之儀風采益尊見聞皆震恭惟某官寶侔鼉采譽冠
月評堯醵舜薰絕翰墨之畦逕周情孔思酌道德之淵
源自祕府之校文以清埃而露穎一言寤意共高憂國
之風六察分官即有事端之語如鷹鷂之必逐鳥爵當

豺狼則不問狐狸白簡凝霜方宵人之落胆巨川作楫
期良弼以調元某賀厦情深掃門迹阻齒牙借譽每叨
華袞之褒羽翮問程有待洪鈞之播

賀陳察院啓

伏審出綽法宮振纓憲府由太史而為御史四海聳聞
遷元方而召季方一門鼎盛輒裁小牘以述僉言恭惟
某官樂奏九韶光分五緯休揚令問赫赫乎逐日以新
刊落陳言飄飄有凌雲之氣遠邇爭傳于師說卷舒豈

自于人為逢解瑟之清明果著鞭而蹕厲既登文石之
陞遂陟道家之山金馬迭居丕變上車之諺阜鵬始擊
具瞻冠豸之威少煩明目張胆于歲月之間即見聚精
會神于槐楓之上某搖心函丈洗耳速郵聞伯夷之風
再三立懦效貢公之喜萬一噓枯

賀陳殿院啓

伏審出言法坐進步憲臺山岳動搖已振豸冠之職夔
龍接躔益崇鷺羽之班朝尊端人士作嘉頌恭惟某官

量函德宇識邃經邪執古道之權衡諧正聲于韶濩望
傾後學仰北斗之垂光名滿絲區軋魁星而齊色遲徊
久矣問譽沛然自復入于帝城即高驤于朝路西崑影
組居張率之清官東觀紬書稱董狐之良史暫騫粉省
嘗飲黃樞俯從六察之游茲慶副端之拜人中屈軼惟
直指于曲邪柱後惠文咸具瞻于剛介風霜是畏霖雨
可期某獲覩速郵正拘左契捉衿布武莫勤倒屣之迎
貢牘搖心敢贊典籤之喜

賀禮部金侍郎啟

伏審顯膺明制進陟清班監二代以從周上方稽古典
三禮而咨伯時可恤功遠暨速郵略無異論恭惟某官
逢原貫變挺操剛方白日青天廓高明于興阜黃鍾大
呂備和粹于律同頌正色以入臺不俛眉而媚竈鵬鶚
匪衆禽之偶豺狼空當路之羣惟道大而不容故天定
而能勝尊朝之始通國相歡果聞前席之談妙簡細旃
之聽臯陶為理解禁網以破觚伯臣司宗告官箴于執

玉共期調燮以慶榮懷茲逢荷橐之除尚謂出綸之晚
某備員仁里借潤榮河仰先達之姓名如瞻箕斗遙下
陳之賓客正隔雲泥

與交代沈正言啟

伏審簡在淵衷改臨輔郡告舊尹之政媿此一麾採遊
童之謠期于五袴先聲所暨公論咸歸恭惟某官星斗
吐芒隨和稽瑞以習是勝非之學為閩中肆外之文卓
爾昂霄壁千仞而獨立淵然韜世陂萬頃以有容自高

羽翮之程無藉齒牙之譽憲臺冠豸嘗振職于風霜諫
紙嬰鱗豈竄名于雷電少遲簪筆不鄙建旗潤九里而
福京師雖倚賢能之力先一州而後天下恐非君相之
心寧俟突黔即迎環賜某已書下考無補秋毫久馳慕
蘭之誠尚阻識韓之願積薪居上固揚糝之可輕解瑟
更張蓋匿瑕之有望

回張侍郎謝送登科記啓

伏以錢萬選而中品事播家聲佛千名以作經望尊時

傑會粹甫成于槩本發揮猥辱于賞音華袞可踰英瑤
何報恭惟某官識窮萬戶語妙二京上軋漢周擅燕公
之大手高出晉魏信籍也之善鳴蚤濟美于八科疊颺
芳于兩穗盜環決獄蔑聞天下之冤簪筆立班有美省
中之語某空疎不學編刻非才一卷之書必立師既阻
得三之問尺牘所傳以為法永誇儷六之藏

賀刑部張侍郎啟

拜命嚴宸升華禁路方君行仁政豈無朝令之更欲下

無冤民尤重秋官之寄除音所洽善類相欣恭惟某官
學洞丘墳文搞黼黻黃鍾大呂函和粹于律同白日青
天仰高明于輿阜蚤摘髭于上第宜策足于要津久矣
徊翔沛然譽處暨清朝之解瑟先望士以握蘭孝宣中
興工既精于技巧臯陶為理刑幾措于累囚茲慶出綸
遂榮持橐仁人既進解禁罔以破觚輿論所期濟巨川
而作楫某久違崇伋快覩速郵貢牘搖心敢替典籤之
喜捉衿布武莫勤倒屣之迎

回蔣通判啟

幾年聆德固望岫以搖心千里寄聲若揮談而對面深
銘永好采激私情伏惟某官智術疏通吏材英發盤錯
素彰于利器委蛇無媿于素絲歌別駕之功嘗翱翔于
名郡下封軺之召即凌厲于滎涂某邈在山城闊然賓
序鳳毛獨秀既欣王事之同雁足遠飛莫報書郵之况
賀吏部凌侍郎啟

伏審中宸作命小宰得賢并九里之潤以福京師効稱

異等掌六典之貳以治官府衆孰間言恭惟某官嫩德
炤隣清規出類黃鍾大呂叅嶰律以含和北斗泰山偃
儒紳而蹈景自解絃而更化即結綬以立班螭均獨擅
于史才鳳閣共推于文樣正朝夕論思之美卓爾得君
以春秋褒貶之嚴翩然出畫連得三刀之益中提六纛
之權峴首颺聲說輕裘之叔子昭亭覓句接澄練于玄
暉政成當五月之初環賜出九天之上少煩清鑒丕變
弊源前馬後盧寒素洽彈冠之喜左周右召邇遐指調

鼎之期某滌耳速郵搖心賀履小侯事大國兩分東壁
之光他日有殊恩倘涉西階之級

賀吏部汪侍郎啓

伏審大昕疏寵小宰立班李下無蹊賴典銓之清鑒遂
上有徑迓傳命于速郵賢者尊朝人皆賀野恭惟某官
中興間氣元精佐臣河目龜文應乾坤之上瑞金口木
舌集聖賢之大成自首中于鼎科宜立登于要路不能
媚竈遙即引舟易地而贊黃堂再斯可矣計年而得朱

絃一何鈍耶會秦道之改絃入英躔而影組剛腸故在
直氣不回屢彈造膝之忠又復乞身而去坐看巧宦躡
取美官老之歲道之蓬領袖久推于虞監周曰庠夏曰
校範模孰出于陽公茲聯筆橐之榮少愜簪紳之望掌
六典之貳以治邦國固已逢辰遂萬物之宜而理陰陽
其誰舍我某情深仰斗迹阻披雲塊北之播大鈞必收
棄物吹噓而起窮羽敢幸衷言

江東提舉謝宰執啟

影組王畿突不黔而避舍乘輅鄉部印已佩而入疆銜
德秦階貢誠小牘伏念某生而能薄仕則數竒自解瑟
之更張兩建旗而無補四牡懷歸于周道已叨就日之
榮六鷁退飛于宋都誰歟去天之遠重來江介豈應星
文陟彼景山籠厥槍旗之利亦有高廩察其雀鼠之欺
所懼弱材難逃大譴此蓋伏遇某官純誠弼后善計安
邦以公道而提衡為儒冠之司命大亲細栢罔非繩墨
之分後雁前鴻併受羽毛之賜乃如謏薄亦玷皇華某

敢不自策疲駑靡忘夙夜茁牛羊而已矣當服官歲問
錢穀之幾何敢為文具

謝前平江朱舍人啓

引車避道望浸遠于日邊夸組入鄉迹不離于江表謙
槩已尊于四益報章有覩于七襄伏念某極陋至愚數
竒不偶稍整傷弓之羽再慙賣劍之風過鳳闕以乘輅
未能黔突遇鵠原之剖竹不暇褰帷官名幸得于舊轡
宦路仍尋于故步雖云食祿之有地頗似販漿而值涼

鞅掌之初忼懔是賴恭惟某官堪輿嘉瑞筆橐前英兼
麗卿雲獨颺聲于藝圃上規姚姒早出樣于綸闈中遭
偃月之譏久蟄衝星之氣會法宮之揔攬起盤谷以騰
振連把一麾咸歌五袴澄江練淨孰追逐于高吟燕寢
香凝復芬芳于故事品藻每私于賤子皇華遂點于外
臺倘非良藥之規寧免素餐之責某始叨誤渥謂借末
光未報雙魚同作去吳之客重瞻疊障但思事楚之時

賀中書虞舍人啓

伏審逢辰得志接晝疏恩螭頭記天子之言久歲金匱
鳳閣目舍人之樣真覩氷銜士歆稽古之榮朝享用賢
之福恭惟某官瑞浮玉壘學禪金籙酌道德之淵源高
眎千古絕翰墨之畦逕自成一家遠陟王城即登冊府
身為國史濃薰班氏之香口伐可汗不屈漢庭之節既
判花而試可宜鳴玉以躋華況邊塵牙孽之秋賴禁瑣
論思之傑山東聽詔使扶杖有感奮之心淮南寢謀無
發蒙相姍笑之語得人之効從昔為然少煩襲六之辭

共恢畫一之治虞夏之書渾渾爾孰敢並驅伊望之業
凜凜乎自然平步某契緣雁塔好重鵠原甫睽隔于趨
隅竊瞻翹于賀厦寵踰華袞已叨一字之褒綸氣轉洪
鈞必念八荒之棄物

賀劉制置啟

伏審誕揚帝制寵建使名匈奴不滅無以家為壯懷舊
矣諸將于是皆以兵屬初令聳然對壘震驚提封呼儼
恭惟某官名聞華裔忠貫義城異表魁梧稟光暉于川

獄羣書該洽講治亂于古今功既立于潁濱威遂傾于
松漠會姦臣之擅政主和議以銷兵養氣衡湘久鬱興
人之望建牙荆楚近分甸服之權高穹開悔禍之期隣
寇倡敗盟之說九重赫怒諸道出師惟發縱指示之得
人則磔裂分犁之有日疇咨僉論無易元勲乃盡護于
列營冀中興于洪業戎車纔動擅幕潛奔仰多美之乘
機宜故都之迎蹕清中原而復濟已誓長江絕大漠以
暫勞卽刊隆岵某自傳成命竊激懦衷聽綸中羽扇之

談莫參檄筆撫簞食壺漿之俗願竄辟書

賀劉右史啓

伏審命播域中班高柱下東觀為老氏之藏久振華纓
右史書人主之言共尊直筆朝有得賢之慶士歆稽古
之榮恭惟某官雅量淵深清矜邁往龜千年而五總鶴
九臯而一鳴博物洽聞學周公仲尼之道同工異曲有
相如揚雄之風早模範于天枝已縱橫于制草不能媚
竈又復杜門既解瑟之更張始著鞭于嚴召賜隄廩之

墨文已應星我獬豸之冠勢能搖岳作英游之領袖騰
廣譽于荐紳黃屋深知赤墀親擢人瑞有鄭仁表侍索
齊肩古事問高仲舒舊羶唾手某不瞻芝采屢變葭灰
捉刺就階近失拜塵之禮裁緘賀厦預欣躍治之期

賀戶部劉侍郎啓

伏審寵超名節歸冠從班乃立地官以佐王卓然振職
不有君子其能國僉曰得人恭惟某官天壤知名山川
稽瑞飛談卷霧一坐盡傾遊刃發硎千人皆廢蚤來槎

而縱壑已簪筆而立朝何物含沙厄風波之洶湧幾年
茹蠱閔嵐障之卷舒金百鍊而繞指不柔玉三獻而則
足非罪會改絃之盛際即植蠹于价藩長城方倚于壯
猷綠野忽濃于歸興惟貨財源流本末未易虛談況金
草沸渭汾汙有加常費既左支右吾之不給且上溢下
漏之孔多言利而析秋豪詎堪俗吏思政而勞旰食孰
慰淵衷倘非心計之英定有頭會之患上能圖舊公必
光前蓋舉偏補弊而多寡得宜則散滯取贏而公私稱

足算鞭擬古豈管晏之功復許乎朽貫指期匪晉楚之
富可及也更湏碩畫同却妖氛素聞倜儻之風必越拘
攣之見使中原遂脫于左衽斯兩地益美于舊疆采之
公言敢為累句某誠深仰斗迹阻披雲泰階有六符之
經具瞻調燮蟠木為萬乘之器竊冀選掄

盤洲文集卷五十九

欽定四庫全書薈要卷一萬五千八百十

集部

盤洲文集卷六十

宋 洪适 撰

啟十七首

賀建康張相公啟

庭揚坦制節換留都復用張子房人始知于良策今朝
漢社稷年新數于中興奔走郵籤震驚邊帳恭惟某官
材苞文武忠格神明熒惑守心嘗生作噩之變咸池洗
日能返大昕之朝初秉執于鴻樞即尊安于龜鼎捫參

歷井國功遂固于西垂踏晉批周相業豈談于前代上
應棟隆之吉外消戶闔之虞出黃石穀城之緒餘掃青
草洞庭之蟠結威讐四夷之長名知三尺之童何物吠
聲舉天飲氣怪已摧于偃月毒尚噴于含沙遠登侯德
之丘色無喜愠再翫反流之渴時有屈信惟用舍繫國
之安危而勝負視公之發縱居否既極旋乾匪難幸悔
禍之昌期稔叛盟之狡計九重赫怒顧割地之請焉可
從二帝陟方豈戴天之讐而不報廟謨潛定戎旆交馳

偶遣將之疲駑致涉淮而猖獗我師棄甲不競南風之
歌有馬飲江孰思多壘之辱人心正恐天意已回逢顯
冊之布宣快輿情而呼僂必資英望始却妖氛安石將
如蒼生何自有折衝之畫魯人猶望高子也願嚴叱馭
之程乘機盡復于故疆當軸聿迎于舊物某寅緣先世
踊躍大鈞盥手發函屢拜一行之賜驤眉茸纛庶叨三
握之私

賀吳殿院啓

芝檢疏榮柏臺進步動搖山岳眷自結于紫宸接遙夔
龍班益尊于黑豸端人益國嘉頌塞塗恭惟某官色正
芒寒心精詞綺高標聳壑仰喬木之千尋利器切泥別
良金于百鍊遭迴幾載舒卷有時自復入于帝城即高
驤于朝路暫分六察遂陟副端柱後惠文咸具瞻于風
采人中屈軼惟直指于姦邪大振紀綱即專機柄某夙
叨一挹屢辱三熏期遠庇于卿雲阻再披于巖電削蕭
氏之牘雖結戀于離羣濯貢禹之冠敢纓情而效喜

賀留守湯相公啟

肅驅駟傳光佩麟符朝廷不知周大夫久歌衮繡闕中
既留蕭丞相必洗甲兵九廟尊安二郵震疊恭惟某官
材推帝賚望峻民瞻窮遠測深馳古今之千載植僵興
仆踰前後之數公玉燭斯調矣精益煥慶泰階之卓爾
懷綠野而翩然居東既鬱于輿人虛左至為之累月夕
遙浸起吳食靡寧當瓜步已應童謠恐棘門或如兒戲
勞軍下詔擇日戒嚴乃注想于棟梁以責成于管鑰霖

雨之思賢佐孰應駿圖半夜而受神釐遂前龍席忠已
殫于碩畫喜果動于咫顏冠規殿以立班入經帷而借
步睠茲行闕倚我上台雖宋璟留中不從東巡之駕而
房喬居守可無西顧之憂行復疆封再還魁柄某方漂
宦海難走沙堤精神折千里之衝式看偉業離奇為萬
乘之器終託洪鈞

賀柳運使啟

伏審戴星叱馭消日視章咸屬耳于前騶獨驤眉于英

矩恭惟某官韜藏遠業充牣多聞璜珩呈韞櫝之珍杞梓負昂霄之幹措刑天獄解密網于秋荼足用地官腐太倉之紅粟屬控弦之犯塞遂增竈以防江六轡有光以穆寧主糧者敕也千金所費必孟子持籌而算之大愷策勲要津唾手某久聆廣譽幸借餘波敷衽論心將釋仰高之恨裁緘寫抱少伸賛喜之誠

謝兩相還隔下年月啓

日月逝矣失未收于東隅江河濯之笑不騰于北壑貢

誠小牘拜況大鈞伏念某智不周身塞而知命昨舍沙
之巧中閱過隙以餘生長裾曳何王之門枉尋豈敢卻
行求前人之影退尺自憐逢黃屋之改絃焚丹書而彈
弁子又有子既齒髮之浸衰春非我春獨銓曹之相阨
念光陰之不再賴造化之可投遂獲舊轡少增短羽石
渠通籍固夢斷于昔遊朝散入銜將坐躋于正秩信眉
竊喜鏤骨有銘恭惟某官道德致君功勲闢國計安天
下猶泰山而四維澤任溝中作霖雨于大旱盡掃錮人

之弊茂聞失職之嗟軫及孤踪還其故步某敢不隄防
墮甑創艾傷弓思枯魚涸轍之時鬼能相笑感黃雀銜
環之事人豈不如

淮東總領謝宰相啓

寄倉臺之使指方點鄉闕督京口之軍須遂聯省戶視
章莅職貢牘酬恩伏念某學陋寡聞器拘小用兩州撫
俗媿任棠拔薤之規旬歲慮僚損倚頓鹽鹽之利正虞
顯絀敢覬褒遷名邁依烏想天街于夢寐智殊流馬惜

江道之轉輸方朝廷易將而築壇况淮海濟師而增竈
多多益辦孰流地上之錢陳陳相因必積塞下之粟豈
容譎薄乃冒使令茲蓋伏遇某官致主德咸備邊慮密
璿璣以齊七政氣應變調尺莖以答四夷功成談笑問
金穀甲兵之事用構櫺窳稅之材欲五將軍不患之興
恐一書生弗能塞責某敢不自鞭駑乘上答化鈞援枹
鼓而立軍門使之宿飽給饋餉不絕糧道戒在空餐

賀汪參政啓

顯拜制麻進參國秉忠臣謂之骨鯁久賴讜言執政猶
吾股肱具瞻良弼播傳所暨欣詠則同恭惟某官道祕
沈潛德輝發越友古人于千載備和氣于四時玉潤金
聲深造淵源之妙瑰意琦行外無表襮之華自得路于
青雲即受知于丹扆論諫皆本仁義卓爾囊封吐茹不
以剛柔瞿然簡劾方上流有禦寇之役以獨坐為視師
之行羽扇指麾聳逗遛之大將靈旗踊躍歸侵軼之故
疆遠却妖氛上寬吳食當和戰之事未定而攻守之議

並興必倚人英來司國是公輔間于兩社式轉洪鈞天
子守在四夷共觀上策某材慙樗櫟契託枌榆燕厦落
成欲奮卑飛之羽螺州前定茲符大拜之謠

賀袁正言啓

顯膺制綍進陟諫坡速郵傳彈擊之詞繇宇起變調之
望恭惟某官儒林宿學藝圃軼材人傑地靈稟光輝于
川嶽仙風道骨挹沆瀣于蓬瀛初步武于金閨將範模
于玉葉既登丹陛旋入憲臺曾黔突之未能已昂霄而

橫絕振爭臣七人之職致明主三代之隆削藁奉公欣
衆正之開路伏蒲獻可待一言以興邦某職有官箴禮
難賓謁聽朝陽之鳴鳳竊激懦衷寓遠客之雙魚庶通
鄙抱

賀張少傅啓

伏審誕布制麻進班孤棘武丁得一傅說致商道之復
興江左自有夷吾知狡謀之難逞慶千朝社聲塞乾
恭惟某官盛德格天誠心憂國掃清君側紀虞淵取日

之功鏖戰關中得高屋建瓴之勢起燕間而制閭閻遠
邇之瞻巖籌遠如卜于六龜增竈浸營于萬弩志將誓
楫利在投機赫英主之龍飛思宗臣而駟召介圭入覲
繡黼來歸信眉乘縱壑之秋造膝盡興邦之策連朝或
聞設醴中吳幾于傳餐台鼎位虛有欲為王留者甲兵
任上疇咨曰汝往哉乃陟貳公之尊以受八面之敵開
幕府于撞牙之地護行都猶奠枕之年尊桐柏而會泗
沂聿新使範分甯參而界韓魏大啓國名制五軍千里

之屯苞四履十連之寄犁庭可俟貌虎猶有鬪心偃草
而旋貂蟬茲惟故物某誦絲綸而溢喜因筆墨以貢誠
憲宗任裴度為難古皆如是鄭人報東門之役今豈不
能竚勒景鐘永光汗簡

回常州知郡啓

伏審式差穀旦來憇棠陰凡千里之提封皆一詞而詠
德伏惟某官受材卓偉函器宏深杞梓千章見謂昂霄
之幹璆琳五穀共推瑞世之珍自歷華途共傳美譽果

拜絲綸之寵超分符竹之榮揚贈扇之仁風芬芳大播
沛隨車之甘雨惠愛無私顧以薄材遠依餘潤曲枉一
行之寄但銘四益之謙

賀宣撫陳舍人啓

伏審光膺三接疊慶九遷綸出詞闈方欲鼓雷風之號
令節兼帥閭又將加草木以威名邸狀始傳輿人相賀
恭惟某官韜經濟之業妙深湛之思譽早冠于英躔望
獨高于禁路國史咸稱良筆寧阿意以特書人主亦有

逆鱗敢犯顏而直諫輟從三院進表六官惟武部必講
于軍防以王人周行于淮甸屯田具便宜之奏保障有
險要之圖借箸以籌凝旒有喜天庭揖遜仰帝舜之重
華人傑延登先甘盤之舊學甫拜西垣之命即分北鄙
之憂蓋乾坤開撥亂之期使夷狄發蒙之語畫疆置
使貳泰階六符之權掌鑰殿邦行方伯連率之職仍冰
銜于鷗閣新油幕之麟符瞻前無鄰自我作古竚清邊
而訖事即當國以調元某鞅掌無庸忤懽有託理財給

餉懼不稱于使令經武視師幸竊窺于方略

賀方鎮江啓

伏審課最乘邊恩隆易地長江古為天塹密護行都千里方曰王畿斯名重鎮歡呼比屋企望高牙恭惟某官量若海涵識猶龜卜盤根錯節知利器之有餘赤箭青芝見敗皮之何用惟胸次足紛綸之學故人中推超卓之材自舟退于急流幾轍環于諸道芳埃所播衆譽迫歸再擁輜軒孟博有澄清之志六分符竹道州勞撫字

之心當淮漬大蹂于干戈獨淝水皆為之煨燼疇咨哲
艾還定流逋犢可買而已徧于田疇蝗雖飛而不傷于
稼穡共稱慈父丕變樂郊為氓俱受于一廛報政遂成
于五月榮開天上官近日邊汲黯不薄淮陽折衝有賴
叔度之來蜀郡敷惠何難即迎紫橐之除寧為黔突之
計某自離賓幕屢換律筭豈期給餉于轅門復遇凝香
于燕寢訟棠可款曾無步武之遙蔭樾焉依更借齒牙
之助

賀平江沈侍郎啓

伏審移輪天末擁戟日邊已滌篆而颺芬庸發函而贊
喜恭惟某官卓然人瑞籍甚吏師學該治忽而恥作虛
談德稟雄剛而力行直道再分郡寄有龔遂之遺風三
仕京華無子文之喜色詞掖變斲憲之誚銓曹草盈几
之私懷鮑宣饑渴之憂上賈誼治安之疏邇遐相語鯁
亮有聲繫今日之輔藩獨長洲為佳地接近鳴珂之里
傳呼持橐之臣竊聞班錄之初已見恩威之並老姦削

迹編戶信眉凝燕寢之清香棠陰閒暇開高秋之紅旆
竹使尊榮方廷中歷召于敢言况海內共期于與政即
尋入覲之詔復結去思之情某密邇門闌焉依宇覆問
一歲錢穀之入正仰殘膏交四隣賓客之辭敢藏窘步

賀兵部周侍郎啓

伏審入覲咫尺顏復騫禁路邊塵未靖擇武部以非輕國
勢既尊慶故疆之可復郵音所暨輿誦載騰恭惟某官
古學貫穿時名暴白懷孟子敬王之道抗霍光震主之

威腕脫把推閱愜人之馳驚燭照龜卜決邪黨之消亡
以砥柱而障頽波蓋疾風而知勁草改絃之始荷橐于
中益高難進之標不改後凋之操翩然出畫久矣專城
會上聖之龍飛先羣公而駟召造膝皆光前之說沃心
無見晚之嗟方興闢國之師遂揔司戎之柄匈奴直百
年之運必覆妖巢宰相遂萬物之宜共期隆棟某情深
仰斗迹阻披雲給餉軍門亦是夏官之屬儲材客館敢
追望士之蹤

賀戶部趙侍郎啓

伏審拜命中宸為真左戶播褒綸于六幕榮寶帶之九
鐸恭惟某官充牣多聞縱橫利器光前絕後名聲顯于
朝廷肆外閔中議論冠諸宗室久騫禁密妙簡淵衷足
用地官斗筭之徒何算也伸威天府銖兩之姦皆知之
以細札而攝空遂青檀之圖舊蓋萬旅雷驅之役正千
金日費之時自非鞭算之過人安得錢流而富國實材
復用興誦迨歸助成再造之勲益對非常之渥某自憐

骭髀獲託幘幪率屬分曹身隔江湖之上裁絨遣介心
馳階閭之間

賀陳運使啓

伏審言出明綸任隆膚使已入疆而滌篆敢憑驛以裁
絨恭惟某官峰距高明材能超詣詠羔羊而厲節參軌
前英瞻黃鵠之凌空著鞭夷路皂蓋溢昔襦之頌朱軒
攬沃轡之威吹噓既徹于榻前飛輓孰踰于轂下二星
所次應穹漢之編珠四牡載驅邇清班之鳴玉某夙聆

廣譽未際高標督餉轅門正懼西曹之謫搖情賓侶願
分東壁之光

賀張樞密啓

伏審嚴宸圖舊密地陟明運籌帷幄之中遐衝震疊歛
衽廟堂之上神器尊安廉陛有光塗川相慶恭惟某官
聖門觀妙昭代蜚英識極高明質著龜而不惑氣至剛
大壓嵩岱而莫搖共尊難進之風獨保後凋之操龍飛
有作駟召鼎來安石將如蒼生何難從雅志魯人猶望

高子也拱族近音方宿留于中途即延登于右府入朝
之始通國相歡天子守在四夷式觀上策公輔間于兩
社即轉洪鈞某躍冶情深班庭迹阻螺洲前定知爰立
之有期燕厦落成何卑飛之足歎

盤洲文集卷六十